

Акафист святым сорока мученикам Севастийским

Кондак 1

Избраннии страстотерпцы Христовы четыредесяте, во граде Севастийстем чрез огонь и воду прошедшии и в покой вечный вшедшии, песньми восхваляем вас, заступников наших. Вы же, яко имущии велие дерзновение ко Господу, от всяких нас бед свободите, любовьию вам зовущих: Радуйтеся, святии четыредесяте мученицы Севастийстии, преславные чудотворцы.

Икос 1

Ангели Божиии, хранители рода человеческого, зряще пред мучителем дерзновенное ваше исповедание Христа, на подвиг страдальческий невидимо вас укрепляху. Мы же ведуще вас, подвиг сей добре совершивших, радостно взываем: Радуйтеся, дерзновенным исповеданием Христа возвеселившие ангелы; Радуйтеся, дивным терпением ваш им мучителей удивившии. Радуйтеся, страдании вашими диавола посрамившии; Радуйтеся, непобедимою силою Христовою противу невидимаго врага вооружившиися и вся злохитрости того на вы и козни победившии. Радуйтеся, неисчетнаго мученическаго лика украшение; Радуйтеся, земная воинствующия Церкви сильнии помощницы. Радуйтеся, святии четыредесяте мученицы Севастийстии, преславнии чудотворцы.

Кондак 2

Видя зверонравный мучитель веру мучеников, заключи их в темницу, Господь же благоутробный яве посети Своя рабы, похваляя начаток подвига их и увещевая неослабно оный совершити. Яко токмо претерпевый до конца венчается в Царствии Небесном, и сподобляется со ангелы пети: Аллилуиа.

Икос 2

Разум божественный от явльшагося вам Христа приемше, утвердистесь в страдальческом подвиге, святии страстотерпцы, и укоризну Агриколая мучителя в похвалу себе вменисте. Сего ради хвалебно Вам вопием: Радуйтеся, разум правый боговедения стяжавший и волю свою воле Божией всецело предавший; Радуйтеся, вся прелести мирския и славу воинскую ради Христа нивочто вменивший. Радуйтеся, ласканий мучителя не

послушавши и грозных того прещений не убоявшиеся; Радуйтесь, темничное заключение ради Христа претерпевшии. Радуйтесь, Спасителем мира во узах посещения, благими словеса от Него утешенни и на подвиг укреплении; Радуйтесь, яко с верою Вас почитающих в скорбех утешаете и от бед избавляете. Радуйтесь, святии четыредесяте мученицы Севастийстии, преславнии чудотворцы.

Кондак 3

Сила Вышняго содела Вас, страсотерпцы святии, сильных в слове пред нечестивыми, темже не терпя дерзновения Вашего, гордый мучитель паки в темницу Вас вверже, в нюже радостно текосте, поюще Богу: Аллилуиа.

Икос 3

Имуще, страсотерпцы, в темнице сострадальца вашего Кириона блага себе учителя, укреплястесь в вере Христовой и по днех осмих ведени бывше на судище, безбоязненно предстаете Лисию-князю и Агриколаю-воеводе, мудре обличисте их нечестие. За таковое Ваше дерзновение приносим Вам сицевая хвалы: Радуйтесь, в броню веры Христовой облеченнии и щитом благодати Его покровеннии; Радуйтесь, единого Христа паче всех возлюбившии и ради Его повеления беззаконныя мучителей презревшии. Радуйтесь, силу Христову пред нечестивыми проповедавшии и всемогущество Божие яве показавшии; Радуйтесь, яко и каменная метания Вам не прикасахуся. Радуйтесь, яко та силою Божию на метающих я возвращахуся; Радуйтесь, яко и ныне молитвами вашими к Богу вражия стрелы от нас отражаете. Радуйтесь, святии четыредесяте мученицы Севастийстии, преславные чудотворцы.

Кондак 4

Бурею злобы противу Христа дыша, гордый Лисий третицею вверже страдальцев в темницу, в нейже паки Христос явися, утешая, ободряя их и нетленные венцы в Царствии Небеснем обещаваая, они же сия слышавше, радостно пояху Богу: Аллилуиа.

Икос 4

Слышавше мучители твердое страсотерпцев Христа исповедание, осудиша я на всенощное в хладнем езере стояние, они же огонь любви божественныя в сердцах имуще, не убояхуся лютаго мраза, но единодушно

славяще Бога, идоша на страдание. Мы же, терпению сих чудящися, зовем сице: Радуйтесь, добропобеднии Христовы исповедницы; Радуйтесь, кумирслужения низложителие. Радуйтесь, терпением лютаго мучения в покой вечный вшедшии; Радуйтесь, болезнями страданий обретшии неизреченные блага. Радуйтесь, драже и крепщии четыредесяте камение; Радуйтесь, Церковь Христову собою укрепляющи и осиявающи. Радуйтесь, святии четыредесяте мученицы Севастийстии, преславные чудотворцы.

Кондак 5

Боготечнии звезды Христовы явистесе святии, в ноцнем хладе во езере Севастийстем сияющи, ихже не прельсти теплая баня соблазна, но со ангелы Богу пояху: Аллилуиа.

Икос 5

Видевше святии, яко един от них отпаде, убоявся мраза ноцнаго, и скрыся в теплой бане и абие умре: тепле взываху ко Господу, да их укрепит в подвизе страдания и прославит имя Свое. Мы же зовем вам сице: Радуйтесь, славнии победоносцы, вся козни сопротивных победившии; Радуйтесь, всю ношь нази во езере стоявшии. Радуйтесь, единодушно тамо Господа призывавшии; Радуйтесь, яко в терпении нашем помощь скорую Господь ниспосла вам. Радуйтесь, яко свет божественный осия вас; Радуйтесь, венцы пресветлии с небесе приявшии. Радуйтесь, святии четыредесяте мученицы Севастийстии, преславнии чудотворцы.

Кондак 6

Проповедницы дивнаго чудесе, стражие, в бани бывшии, поведаша, како в ноци свет небесный во езере облиста мученики, лед растопи, и хлад в теплоту преложи, еже слышавше мучителие паче злобою распалехуся, не ведуще Богу пети: Аллилуиа.

Икос 6

Возсиявшу во езере свету небесному, возсия и в сердце единого от стражей благодать Божия, яко той совлекше ризы своя, ввержесе во озеро ко святым мучеником, восполняя место отпадшаго: и тако посрамися князь тьмы, ликовавый о умалении лика страдальцев, имже ныне вопиет таковая: Радуйтесь, Христовы страсотерпцы, молитвами и терпением вашим веселие

диавола в печаль обративши; Радуйтесь, от злобы и коварства его верная избавляющие. Радуйтесь, в хладе воды благодатию Святаго Духа просветившиеся; Радуйтесь, стоянием вашим во озере мысленного змия главу сокрушивши. Радуйтесь, полная четырехдесятнице Христу бодренно представши; Радуйтесь, верою и страданием ради Христа блаженство райское унаследовавши. Радуйтесь, святии четырехдесяте мученицы Севастийстии, преславные чудотворцы.

Кондак 7

Хотяще чуднии страдальцы веру во Христа непорочно сохранить, славу воинскую и ласкания мучителей нивчтоже вменисте, и вся лютая мучения, аки бесплотнии, притерпесте, поюще Богу: Аллилуиа.

Икос 7

Новое и последнее святии прияша мучение, яко голени их сокрушени млатами быша, и тако скончаша подвиг страдания, прияша от Бога нетленнии венцы. Темже возглашаем в похвалу им сие: Радуйтесь, прекраснии леторасли сада Иисусова, не секирами, но млатом посеченнии; Радуйтесь, сосуды благодати Божией за имя Христово сокрушеннии. Радуйтесь, страдальческий подвиг славно скончавши; Радуйтесь, от ликов ангельских в сожительство приятые. Радуйтесь, от пророк и апостол, яки тех последователие, прелюбезно сретенные; Радуйтесь, рода христианскаго слава великая. Радуйтесь, святии четырехдесяте мученицы Севастийстии, преславнии чудотворцы.

Кондак 8

Странную доблесть показа чудная мать святаго Мелитона, видяще бо телеса мучеников везома на сожжение, своего же сына еще жива суца, взя на рамена своя, и той испусти дух свой Богу, поя: Аллилуиа.

Икос 8

Все зверонравие проявиша мучители, егда повелеша святыя телеса мученик сожещи огнем и прах их в реку воврещи, да истребится от земли память, их, обаче посрамишася; Господь же в роды вечныя прослави я пред ангелы и человеки; сего ради зовем им: Радуйтесь, по словеси псалмопевца, чрез огонь и воду прошедши; Радуйтесь, страstem Христовым общницы. Радуйтесь, врагов Христа низложителие; Радуйтесь, ко Господу за

христианы предстателие. Радуйтесь, верные во правоверии утвердившии; Радуйтесь, неусыпныя молитвенницы за род христианский. Радуйтесь, святии четыредесяте мученицы Севастийстии, преславнии чудотворцы.

Кондак 9

Вси христиане зело удивишася, яко кости святых мученик чудесно нощию в реце яко звезды просияша, и честно собрани, по повелению святых, неоскудныя верным исцеления подают, да поем Богу: Аллилуиа.

Икос 9

Ветия древний пророчески, Божиим Духом озаренный, о кончине верных во псалтири пояше: проидохом сквозе огонь и воду, и извел ны еси в покой; вы же, святии мученицы, делом сие исполниша. Сего ради примите от нас похвалы сицевыя: Радуйтесь, соблюдшии до конца веру Христову; Радуйтесь, страдании вашими, яко злато в горниле, очистившиися. Радуйтесь, предстателие великия к Богу, от бед нас спасающии; Радуйтесь, в скорбех нам помогающии. Радуйтесь, ко спасению душ нас наставляющии; Радуйтесь, святии четыредесяте мученицы Севастийстии, преславнии чудотворцы.

Кондак 10

Спасению нашему споспешницы есте, святии страсотерпцы, темже усердно к вам прибегаем: помозите нам вашим предстательством ко Господу остающее время нашего жития в покаянии проводитьи и всегда благодарно Богу взывати: Аллилуиа.

Икос 10

Стеною молитв ваших оградите нас, святии мученицы, от всяких зол и козней вражиих, да охраняеми вами ублажаем вас сице: Радуйтесь, Кирионе, Кандиде и Домне, божественнаго писания наставницы; Радуйтесь, Агнине, Аетие славнии, на Небо духом возлетевшии. Радуйтесь, Афанасие, Аглаие, Вивиане и Горгоние, Христа Бога возлюбившии; Радуйтесь, Екдите, Гаие, Евноикие, Евтихие, Дометиане и Иоанне, души своя за Христа положившии. Радуйтесь, Исихие, Ираклие, Кирилле, Клавдие, Лисимахе и Леонтие, небесная блага получившии; Радуйтесь, Илиане и Илие, пророку Илие поревновавшии. Радуйтесь, святии четыредесяте мученицы Севастийстии, преславнии чудотворцы.

Кондак 11

Пение хвалебное приносим Вам, святии мученицы, яко любви ради Христовы плоти своея не пощадиште. Темже и память Ваша, яко пресветлый светильник в Церкви сияет, верных духом озаряя, поющих Богу: Аллилуиа.

Икос 11

Светом небесным осиянных зрим вас, преславнии страстотерпцы Христовы, престолу бо Пресвятыя Троицы выну предстоите и о мире молитвы со дерзновением приносите: темже хвалебная вам взываем: Радуйтесь, страстотерпцы Христовы Николае, Приске, Смарагде, Сакердоне, Севериане и Сисиние, злобы вражия победителие; Радуйтесь, Филоктимоне и Феофиле, любви божественныя совершителие. Радуйтесь, Худионе, Ксанфии и Флавие, воины Христовы премудрии; Радуйтесь, Мелитоне, Феодуле и Валенте, раби Бога преславнии. Радуйтесь, Христовы мученицы Валерие, Александре и Акакие; Радуйтесь, весеннею памятью вашею нам весну Христову возвещающии. Радуйтесь, святии четыредесяте мученицы Севастийстии, преславнии чудотворцы.

Кондак 12

Благодатию обильно исполняется обитель Ксиропотамская, имущи честныя останки ваша, преславнии мученицы и чудотворцы, темже и нас память вашу светло совершающих, благодати Божия молитвами вашими исполняйте, да поем чудес подателю Богу: Аллилуиа.

Икос 12

Поюще честная страдания ваша, святии мученицы, прославляем Господа, вас укрепившаго и венцы нетленными венчавшаго, и яко теплых заступников и ходатаев за род христианский, ублажаем сице: Радуйтесь, звезды небесныя от Севастии возсиявшии; Радуйтесь, яко луна духовная, на небо от земли возшедшии. Радуйтесь, яко солнце мысленное, наша скорби просвещаете; Радуйтесь, яко в трудех поста и молитвы нас утешаете. Радуйтесь, четыредесяте крепщии столпы Христовы Церкви; Радуйтесь, всех верных хранителие и защитницы. Радуйтесь, святии четыредесяте мученицы Севастийстии, преславные чудотворцы.

Кондак 13

О святити страстотерпцы Севастийстии, лести лукаваго славнии победоносцы, предстательством вашим у Господа испросите нам победу на душевредныя страсти и гордость житейскую, да в покаянии поживше, Небеснаго Царствия сподобимся, поюще Богу: Аллилуиа.

(Этот кондак читается трижды)

Икос 1

Ангели Божии, хранители рода человеческого, зряще пред мучителем дерзновенное ваше исповедание Христа, на подвиг страдальческий невидимо вас укрепляху. Мы же ведуще вас, подвиг сей добре совершивших, радостно взываем: Радуйтесь, дерзновенным исповеданием Христа возвеселившие ангелы; Радуйтесь, дивным терпением ваш им мучителей удивившии. Радуйтесь, страдании вашими диавола посрамившии; Радуйтесь, непобедимою силою Христовою противу невидимаго врага вооружившиися и вся злохитрости того на вы и козни победившии. Радуйтесь, неисчетнаго мученическаго лика украшение; Радуйтесь, земныя воинствующия Церкви сильнии помощницы. Радуйтесь, святити четыредесяте мученицы Севастийстии, преславнии чудотворцы.

Кондак 1

Избранныи страстотерпцы Христовы четыредесяте, во граде Севастийстем чрез огонь и воду прошедшии и в покой вечный вшедшии, песньми восхваляем вас, заступников наших. Вы же, яко имущии велие дерзновение ко Господу, от всяких нас бед свободите, любовьию вам зовущих: Радуйтесь, святити четыредесяте мученицы Севастийстии, преславные чудотворцы.

Молитва первая

О святити славнии страстоносцы Христовы четыредесяте, во граде Севастии Христа ради мужественно пострадавшии, чрез огонь бо и воду проидосте, и яко друзи Христовы в покой Небеснаго Царствия вшедше, имате велие дерзновение ко Пресвятей Троице ходатайствовати о роде христианском: наипаче же о почитающих святую память вашу, и с верою и любовьию вас призывающих. Испросите у всещедрого Бога прощение согрешений наших и жития нашего исправление, да в покаянии и нелицемерной любви друг ко другу поживше, со дерзновением предстанем

страшному судищу Христову, и вашим предстательством одесную праведнаго Судии предстанем. Ей, угодницы Божии, будите нам защитницы от всех враг видимых и невидимых, да под кровом святых ваших молитв избавимся от всех бед, зол и напастей до последняго дне жизни нашея, и тако прославим великое и достопоклоняемое имя вседетельныя Троицы, Отца и Сына и Святаго Духа, ныне и присно и во веки веков. Аминь.

Молитва вторая

О стратотерпцы Христовы, во граде севастииستم мужественно пострадавшии, к вам, яко молитвенникам нашим усердно прибегаем и просим: испросите у Всещедрого Бога прощение согрешений наших и жития нашего исправление, да в покаянии и нелицемерной любви друг ко другу поживше, со дерзновением предстанем страшному судищу Христову и вашим предстательством одесную Праведнаго Судии предстанем. Ей, угодницы Божии, будите нам, рабам Божиим (имена), защитницы от всех враг видимых и невидимых, да под кровом святых ваших молитв избавимся от всех бед, зол и напастей до последнего дне жизни нашея, и тако прославим великое и достопоклоняемое имя Вседетельныя Троицы, Отца и Сына и Святаго Духа, ныне и присно и во веки веков. Аминь.